

Martullo succumba cun «one in – two out»

Er il cussegl federal vul cumbatter ils custs da regulaziun

■ (anr) **Cun sia emprima e suletta intervenziun succumba Magdalena Martullo (pps/GR). La cussegliera naziunala ha pretendi avant dus onns ina cura radicala encunter la regulaziun. Cun 81 cunter 107 vuschs ha la chombra gronda refusà la mesemna saira sia moziun.** Martullo ha vuli introducir il principi «one in – two out»: Per mintga nova lescha federala che va en vigur duain ins abrogar duas leschas veglias che chaschunan il dubel dals custs da la lescha nova. Era cunvegns internaziunalas ha la politica vuli integrar. Sper sia atgna fracziun han anc intgins politichers da la plud sategnì la moziun.

Passa 5000 relaschs federals

«Regulaziuns chaschunan custs per privats ed interpresas», ha ditg Martullo. «Cun passa 5000 relaschs federals che dumbran en il fratemp 70 000 paginas galoppescha

la regulaziun federala anavant en tempo adina pli rapid.» Mintg'emna vegnian 140 novas paginas vitiers. Interpresas pitschnas e mesaunas, che na possedian nagins spezialists giuridics e birocraics, vegnian stenchentadas en undas da disposiziuns.

En il «doing-business-indicatur» da la banca mundiala – che mussa il burdi administrativ tar fundaziuns d'interpresas u tar dumondas da bajegiar – saja la Svizra crudada enavos sin plaz 33. Uschia restia la Svizra pendida davos ils Stadis Unids, la Gronda Britannia, la Germania e perfin la Frantscha.

Dapi ch'ella saja cussegliera naziunala haja ella aposta inoltrà be la moziun «one in – two out». I na sa tractia betg mo d'in concept teoretic. La Germania applitgeschia quest frain da regulaziun dapi il 2015 ed haja qua tras spargnà gia pliras milliardas euros.

Sin la dumonda da *Corrado Pardini* (ps/BE) sch'ella giavischia d'applitgar il principi era per l'agricultura, ha respundi Martullo ch'ella na lessia en sazez betg metter sin il chau l'agricultura. «Ma sche nus stgaffin novas regulaziuns en l'agricultura duessan nus era puspè reducir regulaziuns.»

«Avair pazienza»

fin ch'il rapport è sin maisa

La finamira da reducir la regulaziun e la birocrazia stettia sisum l'agenda dal cussegl federal, ha ditg cusseglier federal *Johann Schneider-Ammann*. Da preschent saja en lavur in rapport che mussia co ch'ins po introducir in frain da regulaziun. Il minister d'economia ha supplitgà d'avair pazienza fin che quest rapport è sin maisa avant che prender ulteriuras decisivns.



Cussegliera naziunala Magdalena Martullo (pps/GR).